

7. maj 2019

UPA2019/131
Laura Táunâjik

Nakorsat namminersortut nakorsiartarfimmik ingerlatsinissaminnut inatsisitigut allatigullu aporfisinnasartagaannik Naalakkersuisut UKA2019-mut misissueqqullugit peqquneqarnissaannik Inatsisartut aalajangiiffisassaattut siunnersuut. Misissuinermi-lu siunnersuutigineqassaaq aporfiusinnaasut qanoq aaqqinneqarsinnaanersut
(Inatsisartunut ilaasortaq Siverth K. Heilmann, Atassut)

Siunnersuuteqartoq Sivert K. Heilmann Atassummiit, aalajangiiffisassatut siunnersuutaanut Siumumiit qujavugut, imatullu oqaaseqarfigissavarput.

Siumut suliniutiguassavaa innuttaasutpeqqinnissakkut inooqatigiinnikkullu pitsaanerpaamik sullinneqarnissaat atugaqarnissaallu.

Innuttaasut tamatta peqqinnartumik inuuneqarnissarput nammineq akisussaaffigaarput. Innuttaasut tamatta pisussaaffigaarput inoqatitta peqqinnartumik inuunissaannut aqutissiveqataassalluta. Peqqinnissaqarfitta iluani nunatsinni isorartoorsuarmi ilisimavarput akimmiffiit assigiinngitsut nalaanneqartartut, tamatuma takutippaa qanoq pitsanngorsaanissatta toqqavilerluarnissaannik suliniuteqassalluta. Siunnersuuteqartoq isummersuutaatigut tunngavii tamakkiisumik paasilluarpagut tapersersorlugillu. Aningaasarpasuummi pineqartillugit soorunami innuttaasut nakorsiartut sapinngisamik ajunnginnerpaamik sullinneqarnissaat kissaatitta annersaasa ilagaat. Tamanilu taamaaqunaraluaqaaq, aporfiusartullu amerlaqaat. Ilaatigullumi nakorsassaaleqineq sinerik tamakkerlugu nalaanneqartuortoq ilisimavarput.

Ilumoorluinnarpoq kigutit nakorsaat namminersortut illoqarfiup pingaarnersaani nammineq akiliilluni nakorsiarfigineqarsinnaasut arlaqalereerput. Tamatuma isumaa ajunngilluinnarpoq, pisariaqartitsinerlu annertutillugu imminut akilersinnaassuseq qularnanngilluinnartumik ingerlalluarsimassooq.

Naalakkersuisut akissuteqaamminni erseqqissarpaat peqqinnissaqarfik maannakkuugallartoq suliasaqarfimmi arlalinnik suliniuteqartoq. Taassuma saniatigut qallunaat nunaanni nakorsanngorniarlutik utertartut amerlanerulersinniarlugit suliniutit Naalakkersuisuniit tusarlugit isumalluarnarpoq. Ilumut qulakkeerumallugu nunatsinniit nakorsanngorniarlutik ilinniariarlutik aallartartut amerlanerusut utertalernissaat.

Ilanngullugu Naalakkersuisut erseqqissaatigaat nakorsat nakorsiartarfimmik namminersortunik pilersitsinissaannut inatsisitigut aporfissaqanngittut, taamaattumik nakorsatut ilinniagallit periarfissaq tamanna kajumissuseqarfigalugu anguniagaliorsinnaanissaat Siumumiit kaammattuutigerusupparput. Periarfissap ammanera pillugu piumasaqaataasoq ajoqutaanavianngitsoq Siumumiit ilimagaarput, tassalu namminersorlut nakorsat Peqqinnissaqarfimmut suleqateqarnissaat.

Siunnersuuteqartup siunnersuutaa tamakkiisumik paasilluarparput tunngaviatigullu taperserlugu. Taamaattoq Naalakkersuisut akissuteqaamminni ersersippaat suliniutit pitsaap tungaanut sangutinnissaanut periutsit aallartereernerqarsimasut, taamaattumik siunnersuut itigartipparput.

Qujanaq